

viel lachter von dem gang seindt / der zehauwen ist / das ein schacht durchbrochen mög werden. Ich hab nuhn vonn der ersten weise zu vormessen gesagt / nuhn will ich auch von den anderē sagen. So ein gang zu nechst zu anderen streicht / vnd deren mancherley gwercken seindt / die neuwlich in die besizung kommen / sie treiben nuhn ein stollenn / oder ein falort / oder sincken ein schacht / so fallende sie mitt kein recht in der alten gwercken fierung / oder werden auch nicht dafür gehalten / das sie solchs mitt recht ein nāmen: derhalben so forderen dise zum offtermals solchs widerumb mitt recht / oder vnderstonds vor gericht widerumb an sich zebringē. Aber der Marscheider zerlegt eintwerds selbs den gspan vnd den gwercken / oder vnderricht mitt seiner kunst die Richter / recht zu sprechen / das einer von des anderen arz sein handt ablege / derhalben misset er erstmalē mitt den schnüren vñ pastē die grüben beider teill / vnd so er die scheibē od Compass zu inen gsetzt hatt / verzeichnet er die teillen mitt puncten / in welche sie auß gestreckt werden / darnach streckt er die schnür auff der fläche auß / als dan von dem teill / welche gwercken seindt in der alten besizung der fierung / hebt er an gegem anderen teill / es seye nuhn im hangenden oder ligenden des gangs / vnd spannet ein schnür in die quār stracks nach dem sechsten teill des Compass / das ein weitte hatt / vierdthalben lachtern / vnd gibt also den allten gwercken ire gerechtigkeit. Wan aber beide wāndt eines gangs in zweien stollen / oder felorten gegendrumm gehauwen werden / so betracht vorhin ein marscheider wol den vnderen stollen / oder felort / darnach den oberen / wie viel nach vnd nach beide tieffer seye worden. Auff beiden seitten aber / halten zwen starcke menner mitt der handt die außgestreckten schnür so vest / das sie nichts nachgebendt / auff beiden seitten vnderlegt der Marscheider den schnüren stāb die eines halbenn lachters lang seindt / vñnd zwar am hinderen teill ein kurzen knebellden stab / so oft es von nöten ist. Aber etliche binden die schnür an die stāb / damitt sie desto minder wancken. Der marscheider aber hengt an die mitte der schnür ein wag / damitt er zu beiden seittē desto gwüsser könne außwegenn / darauß erfart er / eb der ein stollen mehr dan der ander / darzu ein felort mehr dann das ander auffgstigen seye / darnach so misset er die fläche der schächten auff beiden seitten / das er auch auff beiden seitten ihr seiger gericht haben möge. Als dan so syhet er leichtlich / wie viel lachtern weitt noch durchzehauwen überig seyen. Aber ein jettlicher stollen / wie ich gsagt hab / der hundert lachtern weitt ist / muß tieffer dan ein lachter gehauwen sein.

Das